



Z A P I S N I K

30. sjednice Komisije za vanjsku trgovinu i carine Predstavničkog doma Parlamentarne skupštine BiH, održane 30. marta 2009.godine

Sjednica je počela u 14,45 sati.

Sjednici je predsjedavao privremeni predsjedavajući Komisije Slavko Jovičić.

Sjednici su prisustvovali članovi Komisije: Jozo Križanović, Mehmed Suljkanović, Šemsudin Mehmedović i Ekrem Ajanović.

Opravdano su odsustvovali članovi Komisije: Hadži Jovan Mitrović, Salko Sokolović i Jerko Ivanković Lijanović.

Sjednici su prisustvovali: Martin Raguž, poslanik u Predstavničkom domu Parlamentarne skupštine BiH, Hamdo Tinjak, sekretar MVTEOBiH, Brankica Pandurević, šef Odsjeka za vodne resurse i turizam MVTEOBiH, Nenad Pandurević, sekretar Komisije za vanjsku i trgovinsku politiku, carine saobraćaj i komunikacije Doma naroda PSBiH, Zoran Brkić, viši stručni saradnik u Sektoru za odnose s javnošću PSBiH, Radomir Marjanović, stručni savjetnik u Komisiji, Nihada Hadžić, stručni saradnik u Komisiji i Emira Češljar, sekretar Komisije za vanjsku trgovinu i carine

Za sjednicu Komisije predložen je i jednoglasno usvojen sljedeći

D N E V N I R E D

1. Usvajanje Zapisnika 29. sjednice Komisije;
2. Razmatranje Izvještaja o radu Ministarstva vanjske trgovine i ekonomskih odnosa BiH za 2008. godinu, sadržanog u Izvještaju o radu Vijeća ministara BiH za 2008.godinu;
3. Razmatranje Informacije o poplavama u Popovom polju, rijeci Krupi i na području Hutovog blata, podnosilac: Ministarstvo vanjske trgovine i ekonomskih odnosa BiH;
4. Tekuća pitanja:
 - a) upoznavanje o stavovima Kolegija Predstavničkog doma o terminima održavanja sjednica komisija i
 - b) predstavka „BROVIS“ d.d. Visoko, od 30.3.2009., upućena Komisiji (apel za pomoć peradarsko-živinarskoj proizvodnji u Federaciji BiH i Republici Srpskoj).

Ad.1. Usvajanje Zapisnika 29. sjednice Komisije

Zapisnik 29. sjednice Komisije usvojen je jednoglasno, bez primjedbi.

Ad. 2. Razmatranje Izvještaja o radu Ministarstva vanjske trgovine i ekonomskih odnosa BiH za 2008.godinu, sadržanog u Izvještaju o radu Vijeća ministara BiH za 2008. godinu

U uvodnim napomenama o Izvještaju predsjedavajući Slavko Jovičić rekao je da je Vijeće ministara BiH na 75. sjednici, održanoj 5.2.2009., razmotrilo i usvojilo pojedinačne izvještaje o radu ministarstava, objedinio ih i dostavio Parlamentarnoj skupštini BiH 12.2.2009., kao Izvještaj o radu Vijeća ministara BiH za 2008.godinu. Dalje je istakao da je, na osnovu stava Kolegija Predstavničkog doma, Izvještaj dostavljen svim komisijama dopisom od 19. 2. 2009., sa zadatkom da ih razmotre u okviru svoje nadležnosti, te da Domu dostave svoje mišljenje.

Predsjedavajući je podsjetio da je na prethodnoj sjednici Komisija odlučila da razmatranje navedenog izvještaja odgodi za ovu sjednicu, uz obavezu prisustva ministra vanjske trgovine i ekonomskih odnosa BiH, koji, iz objektivnih razloga, nije mogao prisustvovati sjednici Komisije što je sekretar Ministarstva i obrazložio. Komisija je, s tri glasa „za“ i dva „suzdržana“ glasa, zaključila da sekretar MVTEOBiH može obrazlagati navode iz Izvještaja.

U raspravi su učestvovali: Hamdo Tinjak, Jozo Križanović, Mehmed Suljkanović, Ekrem Ajanović, Slavko Jovičić i Šemsudin Mehmedović.

Hamdo Tinjak istakao je da je Izvještaj rađen na uobičajen način, prikazujući rad Ministarstva kroz četiri osnovne aktivnosti, i to: zakonodavne aktivnosti, međunarodne ugovore, evropske integracije i tematski dio. U sastavu Ministarstva su i dvije upravne organizacije, i to: Uprava BiH za zaštitu zdravlja bilja i Ured za veterinarstvo BiH, čiji je Izvještaj o radu također naveden. Dalje je istakao da postoje strateški dokumenti i politika od koje Ministarstvo ne odstupa i da je velika greška što Komisija i Parlamentarna skupština BiH nisu više uključivani u rad pojedinih radnih grupa, pa ne bi bili u situaciji da jedni o drugima nemamo informacije, što je uočljivo u ovom momentu.

Jozo Križanović istakao je da je ovo priprema za raspravu na Predstavničkom domu i da ova komisija ima svoje mišljenje i stav o radu Ministarstva, koje se najviše ogleda u nezadovoljstvu zbog manjka inicijativa. Nekorisno je ulaziti u analizu broja donesenih zakona, što je formalno pitanje.

Mehmed Suljkanović rekao je da je od početka mandata Komisija dala u proceduru tri prijedloga zakona ali da je, zahvaljujući odnosu Ministarstva, konačan rezultat neusvajanje prijedloga zakona. Očito je da Komisija nije imala partnera u Ministarstvu, te da se o Izvještaju ne može dati pozitivna ocjena.

Ekrem Ajanović složio se s mišljenjem Mehmeda Suljkanovića i dodao da je velika odgovornost ovog ministarstva a da se sve manjkavosti ne mogu pravdati malobrojnim nadležnostima. Apostrofirao je da nije bilo inicijativa Ministarstva za prijenos nadležnosti u rješavanju određenih pitanja kroz pokretanje zakonodavne regulative.

Slavko Jovičić pitao je da li u bilo kojem segmentu rada ova komisija ili bilo koji organ zakonodavne vlasti predstavlja prepreku radu Ministarstva, kako bi se eventualno reagiralo. Obrazlažući postavljeno pitanje, istakao je da bezbroj životno važnih problema čeka odgovor i inicijativu Ministarstva, a toga je nažalost vrlo malo ili nimalo. Kao nepopularan primjer istakao je izmjenu Zakona o carinskoj tarifi za šećer i parcijalno rješavanje problema umjesto sistemskog, što je obaveza zakonodavne vlasti.

Šemsudin Mehmedović naglasio je da je dolaskom novog ministra očigledno došlo do pomaka u radu Ministarstva te da se mogu očekivati bolji rezultati. Također je istakao da se ranije najmanje računa vodilo o deficitu, čije bi smanjenje morao da bude prioritetan i dugoročno najvažniji zadatak. Jasno je, kako je istakao, da je Ministarstvo donosilo podzakonske akte u okviru svoje nadležnosti, pa će obrazloženje podzakonskih akata opredijeliti njegov odnos prema Izvještaju.

Nakon rasprave, s četiri glasa „protiv“ i jednim „suzdržanim“ glasom, Komisija **nije prihvatila Izvještaj o radu Ministarstva vanjske trgovine i ekonomskih odnosa BiH za 2008.godinu**, koji je sadržan u Izvještaju o radu Vijeća ministara BiH za 2008. godinu iz sljedećih razloga:

- a) vanjskotrgovinski deficit Bosne i Hercegovine je i dalje u porastu i pored prijedloga mjera za njegovo smanjenje, a Ministarstvo ne čini ništa da bi se smanjio;
- b) predložene mjere o zaštiti domaće proizvodnje iz Akcionog plana za provođenje programa mjera u okviru CEFTA sporazuma se ne realiziraju;

- c) sporost u usaglašavanju zakonskih projekata i nedonošenje podzakonskih akata;
 - d) vodi se veoma malo računa o mjerama zaštite poljoprivredne proizvodnje, koja je jedan od bitnih elemenata ekonomskog razvoja Bosne i Hercegovine.
- O stavu Komisije obavijestiti Predstavnički dom.

Ad.3. Razmatranje Informacije o poplavama u Popovom polju, rijeci Krupi i na području Hutovog blata, podnosilac: Ministarstvo vanjske trgovine i ekonomskih odnosa BiH

U uvodnim napomenama o Informaciji o poplavama predsjedavajući Slavko Jovičić rekao je da je Predstavnički dom Parlamentarne skupštine BiH na 46. sjednici, održanoj 18.2.2009., razmatrao Informaciju o poplavama u Popovom polju, na rijeci Krupi i na području Hutovog blata s prijedlogom zaključaka koje je poslanik Martin Raguž, na osnovu člana 65. Poslovnika Predstavničkog doma, dostavio Kolegiju 17.2.2009. Stav Kolegija Doma u vezi s uvrštavanjem Informacije u dnevni red 46. sjednice bio je da se o Informaciji ne vodi rasprava na sjednici, nego da se predloži usvajanje zaključaka kojim će se zadužiti Vijeće ministara BiH da, u saradnji s određenim institucijama, dostavi informaciju o nedavnim poplavama u Popovom polju, rijeci Krupi i na području Hutovog blata.

Na jednoglasno usvojeni z a k l j u č a k Doma koji glasi: „Zadužuje se Ministarstvo vanjske trgovine i ekonomskih odnosa BiH da, u saradnji s entitetskim resornim ministarstvima, do naredne sjednice Doma dostavi informaciju o nedavnim poplavama u Popovom polju, na rijeci Krupi i području Hutovog blata“, Ministarstvo je dostavilo traženu informaciju, s priloženim informacijama entitetskih ministarstava.

U raspravi su učestvovali: Martin Raguž, Šemsudin Mehmedović, Brankica Pandurević, Ekrem Ajanović, Jozo Križanović i Mehmed Suljkanović.

Martin Raguž rekao je da se iz informacije Ministarstva vanjske trgovine i ekonomskih odnosa BiH vidi koliko je složen problem upravljanja vodama u BiH, koja ne sadrži odgovor na pokrenuto pitanje i ne nudi ništa novo. Dodao je da konstatacija iz Informacije da je upravljanje vodama javno i transparentno ne stoji i tvrdi da o tome niko ništa ne zna. Jedan od razloga ovolikim poplavama je i to što režim upravljanja vodama nije bio potpun i adekvatan te je zbog toga u svom izvještaju poredao sva mišljenja nadležnih organa.

U pomenutoj i drugim pismenim i usmenim informacijama govorilo se o tome da je bio cilj, osim proizvodnje električne energije, podržati višenamjensko korištenje voda i u poljoprivrednoj proizvodnji i u vodosnabdijevanju, da nijedan važeći vodoprivredni akt ne isključuje mogućnost plavljenja Popovog polja, već samo smanjivanje kako po količini tako i po vremenu trajanja, da je u periodu od 1.11.2008. do 10.2.2009. od izgradnje HE „Trebišnjica“ bilo padavina koje su iznosile 60% godišnjeg prosjeka što je uzrokovalo velike dotoke koji nisu mogli biti akumulirani.

Mišljenje predstavnika Ministarstva je da je potrebno nastaviti aktivnosti preko međuentitetskih komisija i predstavnika Agencija za vodno područje Jadranskog mora, a da MVTEOBiH bude u ulozi koordinatora.

Navedene stavove podržali su ostali učesnici u raspravi. Nakon rasprave, **Komisija je, sa četiri glasa „za“ i jednim „suzdržanim“ glasom, primila k znanju Informaciju Ministarstva vanjske trgovine i ekonomskih odnosa BiH o poplavama u Popovom polju, na rijeci Krupi i području Hutovog blata, te usvojila sljedeće**

ZAKLJUČKE

- a) zadužuje se Vijeće ministara BiH da, u saradnji s entitetskim ministarstvima, uspostavi funkciju na nivou Bosne i Hercegovine koja će biti nadležna za rješavanje upravljanja sistemom voda;
- b) upravljanje slivovima rijeka Trebišnjice i Neretve treba da bude u skladu s okvirnim direktivama o vodama Evropske unije;
- c) Ministarstvo vanjske trgovine i ekonomskih odnosa BiH treba da podstakne realizaciju Sporazuma o grantu Globalnog fonda za okoliš između Bosne i Hercegovine i Međunarodne banke za obnovu i razvoj, kao Agencije za realizaciju sredstava Globalnog fonda za okoliš – Projekat upravljanja Neretvom i Trebišnjicom;

d) da se, prilikom izrade Zakona o vodama u BiH, regulira uspostavljanje regulatorne nadležnosti u upravljanju sistemom voda na nivou Bosne i Hercegovine.

Komisija će predložiti Predstavničkom domu da Informaciju Ministarstva vanjske trgovine i ekonomskih odnosa BiH o poplavama u Popovom polju, na rijeci Krupi i području Hutovog blata usvoji, s navedenim zaključcima, kao osnova za daljnju raspravu.

Ad.4. Tekuća pitanja

- a) Upoznavanje o stavovima Kolegija Predstavničkog doma o terminima održavanja sjednica komisija

Predsjedavajući Komisije upoznao je prisutne s dopisom, od 23.3.2009., o stavovima Kolegija Predstavničkog doma sa 92. sjednice, održane 23.3.2009., o terminima održavanja sjednica komisija Doma i zajedničkih komisija oba doma. Pojasnio je da sjednice komisija, prema stavovima iz dopisa, treba održavati ponedjeljkom, pred sjednicu Doma, koja se, po pravilu, održava dva puta mjesečno, i to srijedom, što su krajnji rokovi za komisije koje zasjedaju tokom cijelog mjeseca, zavisno od pristiglih materijala.

Nakon upoznavanja o stavovima iz dopisa, Komisija ih je jednoglasno prihvatila uz **zaključak** da se za svaku sjednicu Komisije, po mogućnosti, nađe termin četiri -pet dana prije održavanja sjednice Doma.

- b) Predstavka „BROVIS“ d.d. Visoko, od 30.3.2009., upućena Komisiji (apel za pomoć peradarsko-živinarskoj proizvodnji u Federaciji BiH i Republici Srpskoj)

Tekst predstavke podijeljen je prisutnima pred početak sjednice. Sekretar Ministarstva Hamdo Tinjak prokomentirao je navode iz predstavke.

Predloženo je da pripreme konkretne podatke i dokumentaciju na osnovu koje bi se moglo sagledati stanje u ovoj grani poljoprivrede i predložiti konkretne mjere, nakon čega bi se obavio razgovor s predstavnicima peradara iz entiteta prije održavanja naredne sjednice Komisije.

Sjednica je završena u 16,45 sati.

Sekretar Komisije
Emira Češljarić

Privremeni predsjedavajući Komisije
Slavko Jovičić